

CONSELLERÍA DE INNOVACIÓN E INDUSTRIA

Orde do 3 de setembro de 2008 pola que se amplía a dotación orzamentaria da do 28 de marzo pola que se establecen as bases reguladoras para a concesión, en réxime de concorrencia competitiva, de subvencións a Pemes galegas para a adquisición ou renovación de equipamento industrial, e se procede á súa convocatoria (IN530B).

A Orde do 28 de marzo de 2008 publicada no *Diario Oficial de Galicia* nº 68, do 9 de abril, establece as bases reguladoras para a concesión, en réxime de concorrencia competitiva, de subvencións a Pemes galegas para a adquisición ou renovación de equipamento industrial, e se procede á súa convocatoria (IN530B).

No seu artigo 3, precísanse as aplicacións orzamentarias e o importe económico previsto para o financiamento das devanditas subvencións e no seu número 1 sinálase que o importe inicial entenderase máximo sen prexuízo de posteriores variacións producidas como consecuencia da existencia dunha maior dispoñibilidade orzamentaria.

Co obxecto de poder amparar todas as solicitudes, e posto que a dotación inicial resulta insuficiente, tramítase o correspondente expediente de ampliación de crédito, polo que cómpre, mediante esta orde, ampliar a dotación orzamentaria consignada inicialmente para a concesión das mencionadas subvencións.

En consecuencia, de acordo co disposto no artigo 30 do Estatuto de autonomía de Galicia e facendo uso das facultades que me confire a Lei 9/2007, do 13 de xuño, de subvencións de Galicia, e a Lei 1/1983, reguladora da Xunta e da súa Presidencia.

DISPOÑO:

Artigo único

1. Amplíase a dotación orzamentaria que se establece na orde desta consellería do 28 de marzo de 2008, publicada no *Diario Oficial de Galicia* nº 68, do 9 de abril, pola que se establecen as bases reguladoras para a concesión, en réxime de concorrencia competitiva, de subvencións a Pemes galegas para a adquisición ou renovación de equipamento industrial, e se procede á súa convocatoria (IN530B).

2. O incremento da dotación será de 987.900 euros, con cargo á aplicación orzamentaria 10.04.741A.770.0. Axudas para a promoción, internacionalización e mellora da competitividade das empresas dos orzamentos xerais da Comunidade Autónoma de Galicia para o ano 2008.

Unha vez efectuado este incremento, o importe total da dotación orzamentaria, ascende a 7.282.609,13 euros.

3. En todo caso, a concesión das axudas reguladas na dita orde estará limitada as dispoñibilidades orzamentarias.

Disposición adicional

Única.-A ampliación de crédito prevista no artigo único desta orde non afecta o prazo de presentación de solicitudes establecido na Orde do 28 de marzo de 2008.

Disposición derradeira

Esta orde entrará en vigor o mesmo día da súa publicación no *Diario Oficial de Galicia*.

Santiago de Compostela, 3 de setembro de 2008.

Fernando Xabier Blanco Álvarez
Conselleiro de Innovación e Industria

CONSELLERÍA DE SANIDADE

Decreto 199/2008, do 28 de agosto, polo que se aproba a oferta de emprego público das categorías de persoal estatutario licenciado sanitario do Servizo Galego de Saúde para o ano 2008.

De conformidade coas previsións contidas na Lei 7/2003, do 9 de decembro, de ordenación sanitaria de Galicia, así como do Decreto 206/2005, do 22 de xullo, de provisión de prazas de persoal estatutario do Servizo Galego de Saúde, para a convocatoria periódica de procedementos de selección de persoal que garantan os principios constitucionais de igualdade, mérito e capacidade no acceso, procede afrontar a oferta de emprego público de persoal estatutario licenciado sanitario do Servizo Galego de Saúde para o ano 2008.

O ámbito da dita oferta circunscríbense as categorías de persoal estatutario de licenciados sanitarios incluídas no anexo deste decreto.

En consecuencia, tendo en conta as prazas vacantes nas distintas categorías ou especialidades de persoal estatutario licenciado sanitario que afectan o funcionamento dos servizos públicos esenciais, de conformidade co previsto no artigo 30 da Lei 16/2007, do 26 de decembro, de orzamentos xerais da Comunidade Autónoma de Galicia para o ano 2008, cómpre a aprobación da oferta de emprego público relativa ás categorías de persoal estatutario licenciado sanitario do Servizo Galego de Saúde para o ano 2008.

Na súa virtude, por proposta da persoa titular da Consellería de Sanidade, logo da negociación coa representación sindical no seo da Mesa de Negociación do Persoal Sanitario ao servizo da Comunidade Autónoma e logo de deliberación do Consello da Xunta de Galicia na súa reunión do día vinte e oito de agosto do dous mil oito,

DISPONGO:

Artigo 1º.-Aprobación da oferta de emprego público.

De conformidade co disposto no artigo 13.8º do Decreto legislativo 1/2008, do 13 de marzo, polo que se aproba o texto refundido da Lei da función pública de Galicia, así como no artigo 30 da Lei 16/2007, do 26 de decembro, de orzamentos xerais da Comunidade Autónoma de Galicia para o ano 2008, apróbase a oferta de emprego público do persoal estatutario das institucións sanitarias do Servizo Galego de Saúde para o ano 2008 das categorías de persoal licenciado sanitario incluídas no anexo deste decreto.

Artigo 2º.-Cuantificación da oferta de emprego público.

Na oferta de emprego público inclúense as necesidades de recursos humanos con asignación orzamentaria que non poden ser cubertas con efectivos de persoal existentes segundo a distribución que se detalla no anexo deste decreto.

Artigo 3º.-Sistema de selección.

De conformidade co establecido no artigo 6.1º do Decreto 206/2005, do 22 de xullo antes citado, en todas as categorías ou especialidades que se convoquen o sistema de selección será o de concurso-oposición.

Artigo 4º.-Composición dos tribunais de selección.

A composición dos tribunais de selección será paritaria para o conxunto da oferta de emprego público do Servizo Galego de Saúde.

De conformidade co establecido no artigo 60 da Lei 7/2007, do 12 de abril, do Estatuto básico do empregado público, a pertenza aos órganos de selección será sempre a título individual, polo que non se poderá pertencer a eles en representación ou por conta de ninguén.

Artigo 5º.-Promoción interna.

1. Reservarase un cincuenta por cento do total das prazas convocadas en cada categoría ou especialidade para a súa provisión polo sistema de promoción interna.

Non obstante o anterior, poderá establecerse unha reserva inferior cando así veña xustificado pola planificación eficiente das necesidades, polas características específicas da categoría ou especialidade ou pola propia titulación requirida para o acceso.

2. Cando o resultado da aplicación da citada porcentaxe dea un resto igual ou superior a 0,5 prazas, computarase como unha praza que se incluírá nesta reserva.

3. As prazas non cubertas acumularanse ao sistema de acceso libre.

Artigo 6º.-Persoas con discapacidade.

1. Nos procesos selectivos para o ingreso nas categorías ou especialidades de persoal estatutario do Servizo Galego de Saúde serán admitidas as persoas con discapacidade nos termos previstos neste artigo e demais normativa aplicable.

As convocatorias non establecerán exclusións por limitacións psíquicas e/ou físicas sen prexuízo das incompatibilidades co desempeño das tarefas ou funcións correspondentes.

2. De conformidade co establecido na disposición adicional sétima do Decreto legislativo 1/2008, do 13 de marzo antes citado, reservarase unha cota non inferior ao sete por cento das vacantes ofertadas para seren cubertas por persoas con discapacidade, considerando como tales as definidas no artigo 1.2º da Lei 51/2003, do 2 de decembro, de igualdade de oportunidades, non-discriminación e accesibilidade universal das persoas con discapacidade, sempre que superen os procesos selectivos e acrediten a súa discapacidade así como a compatibilidade no desempeño das súas funcións, de modo que, progresivamente, se acade o dous por cento dos efectivos totais da Administración da Xunta de Galicia.

A reserva farase sobre o cómputo total das vacantes incluídas nesta oferta de emprego público e poderán concentrarse as prazas reservadas para persoa con discapacidade naquelas convocatorias que se refiran a categorías ou especialidades cuxo desempeño se adapte mellor ás peculiaridades das persoas con discapacidade, podéndose excluír desta reserva aquelas categorías ou especialidades que se consideren incompatibles coas tarefas ou funcións que requiran os postos de traballo, sen que a cota de reserva total se vexa alterada.

Cando da aplicación da porcentaxe resulten fraccións decimais, redondearase por exceso para o seu cómputo.

O número de prazas reservadas quedará recollido na correspondente convocatoria.

Se as prazas reservadas e que foron cubertas polas persoas con discapacidade non acadasen a taxa do tres por cento das prazas convocadas, as prazas non cubertas acumularanse á cota do sete por cento da oferta seguinte, cun límite máximo do doce por cento.

3. A opción a prazas reservadas terá que formularse na solicitude de participación nas convocatorias con declaración expresa dos interesados de reunir a condición exixida ao respecto, que se acreditará, se obtívese praza, mediante certificación dos órganos competentes.

4. As probas selectivas realizaranse en condicións de igualdade co resto dos aspirantes de promoción interna ou de acceso libre, segundo corresponda. Non obstante o anterior, no desenvolvemento das probas selectivas estableceranse, para as persoas con discapacidade que o soliciten, as adaptacións e axustes razoables necesarios de tempo e de medios para a súa realización, de acordo co disposto no Orde PRE/1822/2006, do 9 de xuño, pola que se establecen criterios xerais para a adaptación de tempos adicionais nos procesos selectivos para o acceso ao emprego público de persoas con discapacidade, para asegurar que estas persoas participen en condicións de igualdade. Nas convocatorias indícarase expresamente esta posibilidade, así como que os

interesados deberán formular a correspondente petición concreta na solicitude de participación.

Para tal efecto, os tribunais de selección poderán requirir informe e, se é o caso, colaboración dos órganos técnicos da Administración laboral, sanitaria ou dos órganos competentes.

5. Con anterioridade ao nomeamento, e unha vez superado o proceso selectivo, o Servizo Galego de Saúde poderán requirir, respecto das persoas que acceden por esta cota de reserva, ditame do órgano competente sobre a compatibilidade do candidato para o posto de traballo ou sobre as adaptacións deste.

6. As convocatorias deberán incluír a posibilidade de que, unha vez cubertas as prazas desta cota, os aspirantes que superasen o proceso selectivo pero non obteñan praza pola cota de reserva poidan optar, en igualdade de condicións, ás prazas do sistema de acceso libre.

7. Os aspirantes que superasen o proceso selectivo pola cota de prazas reservadas a persoas con discapacidade poderán solicitar ao órgano convocante a alteración da orde de prelación para a elección das prazas dentro do ámbito territorial que se determine na convocatoria, por motivos de dependencia persoal, dificultades de desprazamento ou outras análogas, que deberán ser debidamente acreditados. O órgano convocante decidirá a devandita alteración cando estea debidamente xustificada, e deberá limitarse a realizar a mínima modificación na orde de prelación necesaria para posibilitar o acceso ao posto da persoa con discapacidade.

Artigo 7º.-Acreditación do coñecemento da lingua galega.

Para lle dar cumprimento á normalización do idioma galego e garantir o dereito dos usuarios dos distintos servizos sanitarios do Servizo Galego de Saúde ao seu uso, así como a promoción do uso normal do galego por parte dos poderes públicos de Galicia, terá que acreditarse o coñecemento da lingua galega nos termos que establezan as correspondentes convocatorias.

Artigo 8º.-Comisións ou grupos de traballo.

1. O órgano convocante, en atención ao elevado número de aspirantes, poderá nomear comisións ou grupos de traballo para realizar as tarefas auxiliares de carácter técnico ou organizativo que lle sexan encomendadas, sen que a súa actuación afecte as competencias e a autonomía dos tribunais de selección.

2. Os membros destas comisións ou grupos de traballo absteranse de intervir no procedemento cando se dea algunha das circunstancias previstas no artigo 28.2º da Lei 30/1992, do 26 de novembro, de réxime xurídico das administracións públicas e do procedemento administrativo común.

3. Os membros das comisións ou grupos de traballo percibirán as asistencias previstas no Decreto 144/2001, do 7 de xuño, sobre indemnizacións por razóns de servizo ao persoal con destino na Administración autonómica de Galicia ou norma que a substitúa.

Para tal efecto, serán clasificados conforme o artigo 26.2º do devandito decreto.

Disposición adicional

As convocatorias adaptaranse ás previsións da Lei 7/2004, do 16 de xullo, para a igualdade de mulleres e homes, en relación coas condicións de emprego da Administración pública.

Disposicións derradeiras

Primeira.-Facúltase a persoa titular da Consellería de Sanidade para ditar, dentro das súas competencias, as normas precisas para o desenvolvemento deste decreto.

Segunda.-Este decreto entrará en vigor o día seguinte ao da súa publicación no *Diario Oficial de Galicia*.

Santiago de Compostela, vinte e oito de agosto de dous mil oito.

Emilio Pérez Touriño
Presidente

María José Rubio Vidal
Conselleira de Sanidade

ANEXO

Categoría/especialidade	Total
Médico/a de familia	602
Odontólogo/a A.P.	24
Pediatra A.P.	25
Farmacéutico/a A.P.	3
Médico/a coordinador/a 061	2
Alerxoloxía	3
Análises clínicas	4
Anatomía patolóxica	5
Anestesioloxía e reanimación	36
Anxioloxía e cirurxía vascular	1
Aparello dixestivo	4
Cardioloxía	12
Cirurxía cardiovascular	1
Cirurxía oral e maxilofacial	2
Cirurxía ortopédica e traumatoloxía	23
Cirurxía pediátrica	1
Cirurxía plástica, estética e reparadora	2
Cirurxía torácica	3
Cirurxía xeral e do aparello dixestivo	16
Dermatoloxía médico-cirúrxica e venereoloxía	2
Endocrinoloxía e nutrición	2
Farmacia hospitalaria	5
Hematoloxía e hemoterapia	5
Medicina do traballo	3
Medicina física e rehabilitación	5
Medicina intensiva	9
Medicina interna	25
Medicina preventiva e saúde pública	1
Médico urxencias hospitalarias	43
Microbioloxía e parasitoloxía	3
Nefroloxía	4
Neurofisioloxía clínica	3
Neuroloxía	12
Obstetricia e xinecoloxía	20
Oftalmoloxía	16
Oncoloxía médica	6
Oncoloxía radioterápica	1
Otorrinolaringoloxía	7
Pediatría e as súas áreas específicas	18
Pneumoloxía	3
Psicoloxía clínica	4
Psiquiatría	14
Radiodiagnóstico	11
Radiofísica hospitalaria	2
Reumatoloxía	4
Uroloxía	3
Xeriatría	1
Total	1.002